



Claude WISELER
President vun der
Chamber vun den Deputéierten
19, um Krautmaat
L-1728 Lëtzebuerg

Lëtzebuerg, den 11/02/2026

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.

A senger Äntwert op meng Fro n°3299 huet de Minister op den Neutralitéitsprinzip vun de Crèche verweisen, déi ee staatlechem Agreement hunn. Allerdéngs gouf net explizitt op d'Fro agaangen, ob d'Aushänke vun engem Fändel, am Kader vun dëser juristescher Analyse, dann elo erlaabt ass oder net. Mir ass ee Fall bekannt, wou eng privat Crèche ee Palestina-Fändel ausgehaangen huet, woumadder ee politesche Message gemaach gëtt.

An deem Zesammenhang wëllt ech dem Minister dës Fro stellen:

1. Dierf eng Crèche, déi ëffentlech finanzéiert gëtt oder ee staatlechen Agreement huet, ee palästinensesche Fändel ophänken?
Falls jo: ënnert wéi enge konkrete Krittären ass dat erlaabt, a wéi gëtt an deem Fall garantéiert, datt de Neutralitéitsprinzip agehale gëtt?

Mat déiwem Respekt,

GOERGEN Marc
Deputéierten



piraten.lu





Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 3644 vum honorabelen Deputéierte Marc Goergen

- 1. Dierf eng Crèche, déi ëffentlech finanzéiert gëtt oder ee staatlechen Agreement huet, ee palästinensesche Fändel ophänken? Falls jo, ënnert wéi engen konkrete Krittären ass dat erlaabt, an wéi gëtt an deem Fall garantéiert, datt den Neutralitéitsprinzip agehale gëtt?**

Wéi schonn an der Äntwert op déi parlamentaresch Fro Nr. 3299 ausgefouert, ënnerleien d'Bildungs- a Betreuungsstrukture fir Kanner de gesetzlechen a reglementaresche Virgaben, déi garantéieren, datt dës Strukture fir all Kand zougänglech sinn, onofhängeg vun ideologeschen, philosopheschen oder reliéisene Hannergrënn, an datt d'Recht vun all Kand op Privatsphär souwéi de Respekt vu senger reliéisener oder philosophescher Iwwerzeegungen assuréiert gëtt.

No de gültege gesetzlechen a reglementaresche Bestëmmunge besteet fir Bildungs- a Betreuungsstrukture fir Kanner keen ausdrécklecht generell Verbuet, dat d'Aushänke vu Fändelen per se ausschléisst.

Allerdéngs ass den Affichage vu politeschen, ideologeschen oder reliése Symboler net akzeptéiert, soubal dësen am konkrete Kontext dozou féiert, datt déi uewen ernimmte gesetzlech a reglementaresch Virgaben net méi respektéiert ginn.

Dës Bewäertung huet an all Fall ausschliisslech op Basis vun de konkreten Ëmstänn ze erfollegen, nodeems de betraffene Gestionnaire am Virfeld formell iwwert de Verdacht vun enger méiglecher Verletzung vun de gesetzlechen oder reglementaresche Virgaben informéiert ginn ass, an d'Méiglechkeet kritt huet, seng Observatiounen dozou virzebréngen. Op Basis vun dësen Elementer behält sech de Ministère vir, déi virgesinnen administrativ Schrëtt a Moosnamen anzeleeden.

Bis ewell ass dem Ministère fir Educatioun, Kanner a Jugend een eenzege Fall gemellt ginn, bei deem eng Bildungs- a Betreuungsstruktur e palästinensesche Fändel opgehaange gehat hätt.

No enger Iwwerpréiwung duerch den zoustännege Service vum Ministère huet sech allerdéngs erausgestallt, datt an deem betraffene Gebai zu deem Zäitpunkt keng Bildungs- a Betreuungsstruktur fir Kanner méi exploitéiert gouf, déi iwwer en Agreement oder eng Konventioun mam Staat verfüegt. Zousätzlech gouf festgestallt, datt den Affichage net vun der Bildungs- a Betreuungsstruktur ausgaangen ass, déi virdrun an deem Gebai war, mee vum Nofollgernetzer vun de Raimlechkeeten, soudatt kee Grond fir eng Interventioun vum Ministère bestanen huet.

Lëtzebuerg, den 13. Mäerz 2026

De Minister fir Educatioun,
Kanner a Jugend

(s.) Claude MEISCH